

State Emergency Operations Center (Lub Xeev Qhov Chaw Khiav Hauj Lwm Pab Tib Neeg Thaum Muaj Xwm Ceev) txoj kev pab cov nroog uas raug dej nyab raws li lawv cov lus thov

St. PAUL - Thaum tib neeg tej khoom los sis vaj tse yuav raug teeb meem los sis yauv raug kev puam tsuaj, zoo li qhov peb muaj tau los li ib lim piam no, cov neeg uas lawv mus pab tib neeg ua ntej thiab cov neeg uas lawv mus pab hauj lwm dawb yeej sib zog heev los mus tiv thaiv lawv cov zej cov zos.

Tiam sis, thaum cov nroog tsis muaj tib neeg txaus mus pab pej xeev nyob rau thaum muaj ib qhov xwm ceev los sis ib qhov kev puam tsuaj loj, cov nroog yeej mus thov tau kev pab los ntawm lub xeev.

“Peb yeej paub hais tias cov neeg uas lawv mus pab tib neeg ua ntej thiab cov coj nyob hauv cov zej zos thaum muaj ib qhov xwm ceev sib zog khiav hauj lwm npaum li cas,” lub chaw Minnesota Department of Public Safety’s Homeland Security and Emergency Management (HSEM) tus Deputy Director, Kevin Reed, tau hais. “Peb txoj hauj lwm nyob hauv SEOC yog los mus koom tes nroog cov coj ntawd thiab los mus npaj kev pab sawv cev lub xeev rau cov nroog uas yuav tsum tau pab.”

HSEM yeej pab raws li cov lus thov ntawm no uas yog siv lub chaw State Emergency Operations Center (SEOC) nroog lwm cov chaw los sis koom haum:

- Minnesota Department of Agriculture (Minnesota Lub Chaw Tuav Dej Num Saib Xyuas Kev Ua Liaj Ua Teb)
- Minnesota Department of Transportation (MnDOT) (Minnesota Lub Chaw Tuav Dej Num Saib Xyuas Kev Khiav Kev Mus Los)
- Minnesota Department of Natural Resources (Minnesota Lub Chaw Tuav Dej Num Saib Xyuas Khoom Siv Txhua Yam Uas Ib Txwm Muaj)
- Minnesota Department of Health (Minnesota Lub Chaw Tuav Dej Num Saib Xyuas Kev Noj Qab Nyob Zoo)
- Minnesota Pollution Control Agency (Minnesota Lub Chaw Tuav Dej Num Saib Xyuas Kev Muaj Huab Cua Tsis Huv Siab)
- Minnesota Department of Corrections (Minnesota Lub Chaw Tuav Dej Num Saib Xyuas Neeg Txhaum Plaub)
- Minnesota National Guard (Minnesota Cov Tub Rog)
- Minnesota Department of Public Safety (DPS) State Fire Marshal (SFM) division
- The U.S. (Teb Chaw Meskas) Army Corps of Engineers (USACE)

“Tau ntau ntau hnuv los no, peb yeej tau mus pom cov teeb meem los sis kev puam tsuaj uas peb cov pej xeev thiab lag luam tau ntsib,” DPS Commissioner Bob Jacobson tau hais. “Ntau ntau qhov, nws yeej ua rau koj cia li xav tsis tau dab tsi tag li lawm. Peb yeej muab qhov ntawd pauv tsis tau, tiam sis peb yeej mus pab tau cov tib neeg uas tau ntsib teeb meem los ntawm cov kob nag thiab qhov kev muaj dej nyab ntawm no. Qhov teeb meem no yuav tsis yog ib qhov uas yuav daws tau sai. Peb yeej npaj los pab sawv daws mus txog thaum daws tag qhov teeb meem. Los mus ua lub xub pwg, los mus ua ib lub chaw pab thiab los mus nyob rau ntawd thaum cov neeg tab tom kho lawv tej khoom thiab vaj tse thiab tom qab lub sij hawm ntawd.”

SEOC cov neeg ua hauj lwm yeej tau koom tes nroog cov nroog thiab cov neeg saib xyuas xwm ceev hauv nroog nyob rau lub lim piam no los mus npaj cov kev pab nram qab no rau cov zej zos uas muaj dej nyab nyob thoob plaws hauv lub xeev:

- Cov neeg sib pab khiav hauj lwm uas muaj npe hu ua Minnesota All-Hazards Incident Management Team, ib pawg neeg mus pab tib neeg ua ntej nyob thoob plaws hauv lub xeev thaum muaj xwm ceev, yeej mus pab Jackson County saib xyuas qhov teeb meem.
- USACE yeej tau npaj muaj 175,000 hnab xuab zeb thiab ntau lub tshuab nqus dej mus pab tiv thaiv tej vaj tse thiab kev tseem ceeb nyob hauv Rice, Le Sueur, Jackson, Rock, St. Louis thiab Blue Earth County.
- Tswv Xeev Tim Walz yeej tau xa Minnesota National Guard (Minnesota Cov Tub Rog) mus pab, thiab 44 tus tub rog yeej mus pab Nroog Jackson khiav hauj lwm nqus dej.
- Lub koom haum Minnesota Voluntary Organizations Active in Disaster yeej tau mus npaj ib cov chaw so nyob hauv Cook thiab Faribault, mus pab tshem tej khoom ub khoom no thiab qhib ib tus xov tooj 211 los mus pab kom cov pej xeem mus nrhiav tau cov kev pab dawb.
- Lub chaw Department of Corrections yeej tau xa 75 tus neeg uas raug kaw nyob ntawm Faribault Correctional Facility mus pab ntim cov hnab xuab zeb.
- SFM tau tso tsib tus kws tua hluav taws nyob ntawm Luverne thiab Minneapolis mus pab hauj lwm nyob ntawm Jackson Fire Department nrog ob lub nkoj tos yuav mus pab cov tib neeg uas poob deg.
- USACE thiab MnDOT yeej koom tes nrog cov nroog hais txog kev saib xyuas cov kev thiab vaj tse tseem ceeb thiab kev mus soj ntsuams, suav nrog rau kwv yees hais tias saib yuav muaj dej nyab mus zoo li cas
- DPS yeej tau khiav hauj lwm nrog [TPT NOW](#) los mus muab cov ntaub ntawv qhia txog kev nyab xeeb uas hais ua ntau yam lus coj mus tshaj tawm thiab muab rau tib neeg.

Lub xeev los yeej tau koom tes nrog Federal Emergency Management Agency, uas yeej tau tuaj saib xyuas hauj lwm ntawm cov nroog muaj xwm ceev nyob hauv lub lim piam no. Qhov kev saib xyuas kev pab ntawm no yeej ua rau lub xeev pab tau cov nroog uas raug dej nyab raws li qhov lawv xav tau tam sim no thiab yav tom ntej.